

chastiez, il sçait l'heure que la pluye tombera sur la terre, il sçait ce qui est dans le ventre des femmes si c'est masse ou femelle, personne ne sçait que Dieu ce que tu feras demain, personne autre que luy ne sçait en quel lieu tu mourras, il sçait tout, il sçait tout.

*LE CHAPITRE DE L'ADORA-
tion, contenant cent trente versets,
escriit à la Meque.*

AV Nom de Dieu clement & misericordieux. Je suis Dieu tres-sage. Sans doute ce liure a esté enuoyé par le Seigneur de l'Vniuers, les impies diront ils que tu l'as controuué? au contraire, c'est la verité mesme qui procede de ton Seigneur pour prescher ceux qui n'ont cy-deuant eu personne pour les instruire, peut-estre qu'ils suiuront le droict chemin. Dieu a créé le Ciel & la Terre, & tout ce qui est entr'eux en six iours, & s'est assis en son trône; qui vous protegera: & qui exaucera vos prieres autre que luy? n'y penserez-vous iamais: Il dispose de toute chose au Ciel & en la Terre, tous les hommes seront vn iour assemblés deuant luy pour estre iugez, mille ans ne sont qu'un iour deuant sa diuine Majesté, il sçait le passé, le present & le futur, il est tout-Puissant & misericordieux, il a créé toute chose pour son peuple, il a formé l'homme du limon de la terre & de
boüe

boïe, il a inspiré l'ame dans son corps, il vous a donné l'oüie, la veüe & le sentiment, mais peu degens le remercient de ses graces : Ils disent, quoy nous mourrons & retournerons estre vn peuple nouveau ? Certainement ils ne croyent pas en la resurrection; Dis leur, l'Ange de la mort vous fera mourir, & retournerez deuant Dieu pour estre jugez. Tu verras alors comme les infidelles baisseront la teste deuant leur Seigneur, & diront, Seigneur nous voyons maintenant la certitude de la resurrection, Nous cognoissons aujourd'huy la verité de tes paroles, permets que nous retournions au monde, nous serons gens de bien, nous sçauons maintenant ce qui nous est vtile & necessaire ; Nous pouuions donner vn conducteur à chaque personne, ma parole est tres-veritable, ie rempliray l'Enfer de meschans, & le Paradis de gens de bien, ainsi les hommes seront recompencez & chastiez selon leurs œuures. Goutez, ô impies, les peines que vous auez meritees de n'auoir pas voulu croire en ce iour que vous auez rencontré, nous vous delaissons dans les miseres deuës à vostre incredulité, goutez les tourmens eternels que vous auez meritez par vostre impieté. Ceux qui croyét aux mysteres de ma loy sont humbles, ils m'adorét seul & me louënt quand ils entendent parler de moy, ils ne sont pas orgueilleux, ils ne s'esleuent pas contre mes cōmandemens, ils se leuent du lit pour faire leurs prieres avec crainte & esperance, & despensent en œuures pies quelque partie des biens que nous leur auôs

donnez. Personne n'a veu ny ne sçait ce que Dieu
 garde pour recôpenser les gens de bien de leur perse-
 uerance. Les fidelles & les infidelles ne seront pas
 traitez éгалlement. Les fidelles qui auront fait de
 bonnes œuures, iouïront du Paradis pour recom-
 pense de leurs trauaux, & les infidelles seront preci-
 pitez dedans le feu d'Enfer, plus ils s'efforceront d'en
 sortir, & plus auant ils y entreront, on leur dira,
 gouttez les peines des flammes eternelles que vous
 n'avez pas voulu croire, le feray gouster aux impies
 les tourmens du monde, & les peines de l'Enfer s'ils
 ne se conuertissent; qui est plus iniuste que celuy qui
 sçait les commandemens de son Seigneur, & ne luy
 obeit pas? nous prendrons vengeance de son impie-
 té, nous auons donné vn liure tres- veritable à Moïse
 pour instruire les enfans d'Israël, nous auons mis au
 droit chemin ceux d'entr' eux qui ont perseueré en
 leur foy, & qui ont obey nos commandemens. Ton
 Seigneur iugera les difficultez des infidelles au iour
 du iugement, ne voyent-ils pas combien nous auons
 exterminé de peuple aux siecles passez, qui repo-
 soient dans leurs maisons? c'est vn signe de nostre
 toute- Puissance, ne le comprendront-ils iamais?
 Ne voyent ils pas que ie pousse l'eau dans les terres
 desertes & incultes? que ie fais produire des herbes
 pour nourrir les hommes & les animaux? Ne le con-
 sidereront-ils pas? ils demandent quand viendra le
 iour du iugement; Dis leur, ce iour n'apportera point
 de contentement aux infidelles & seront sans prote-

tion. Esloigne-toy deux, perseuere & attends, ils attendent l'occasion de te maltraiter, mais tu les verras chastier.

LE CHAPITRE DES BANDES

& Troupes des gens de Guerre, contenant

quatre-vingts-sept versets, escrit

à la Medine.

AV nom de Dieu clement & misericordieux. O Prophete! crains Dieu, & n'obeyes pas aux infidelles, Dieu sçait tout & est tres-prudent en ce qu'il ordonne, obserue ce que ton Seigneur t'a enseigné, il sçait ce que les hommes font, resigne toy en Dieu, il te doit suffire qu'il te protege. Il n'a pas donné deux cœurs aux hommes, il ne nous a pas ordonné d'appeller vos femmes vos Meres, tous ceux que vous appelez vos enfans ne sont pas vos enfans, vous le dietes seulement de bouche, mais Dieu diët toujours la verité, & conduit les hommes au chemin de salut. Appelez vostre prochain par le nom de son pere, cette action sera agreable à Dieu, pourueu que vous n'ayez point de mauuais dessein dans le cœur, si vous ne sçauetz pas son nom appelez-le vostre frere en Dieu, où Monsieur, Dieu est clement & misericordieux. Le Prophete est obey par ceux qui croient en Dieu, & qui honorent ses femmes